

四庫全書

子部

欽定四庫全書

冊府元龜卷二百七十一 宋 王欽若等 撰

宗室部

武勇 剛正

武勇

夫泱泱之述於周雅化化之著於秦誓皆武勇之謂也
矧乃挺生公族夾輔王室而特資異稟雄材傑出或參
預締構功宣戎旅或遭罹否阨事以戡濟或揚威以克

敵或奮怒以屏盜維城之重垣翰之寄於是乎在矣然而武者取其止戈勇者謂之達德矜能恃力古人所戒故曰天下有事用之於戰勝天下無事用之於禮義苟異於是雖有過人絕倫之藝搏熊扛鼎之力適足為亂亡之本可不慎乎

漢淮南厲王長高帝少子早失母嘗附呂后孝惠呂后

時以故得幸無患然嘗心怨辟陽侯

審食其

不敢發及孝

文即位三年入朝厲王有材力扛鼎乃往詣辟陽侯辟

陽侯出見之即日褻金椎椎之

謂以金椎藏置
褻中出而椎之

命從者

刑之

直斷其
首也

馳詣闕下肉袒謝曰臣母不當坐趙時事辟

陽侯力能得之吕后不爭罪一也趙王如意子母無罪
吕后殺之辟陽侯不爭罪二也吕后王諸吕欲以危劉
氏辟陽侯不爭罪三也臣謹為天下誅賊報母之仇伏
闕下請罪帝傷其志為親故不治赦之

江都易王非孝景之次子也孝景前二年立為汝南王
吳楚反時非年十五有材氣上書自請擊吳景帝賜非

將軍印擊吳吳已破徙王江都治故吳國

治謂都之劉潭所居也

以軍功賜天子旗元光中匈奴之入漢邊非上書願擊

匈奴武帝不許非好氣力治宮館招四方豪傑

廣陵厲王胥孝武次子也壯大好倡樂逸遊力扛鼎空
手搏熊羆猛獸

後漢陳王寵善弩射十發十中中平中黃巾賊起郡縣
皆棄城走寵有強弩數千張出軍都亭國人素聞王善
射不敢反叛故陳獨得完百姓歸之者衆十餘萬人

魏任城威王彰太祖子也少善射御膂力過人手格猛
獸不避險阻數從征伐志意慷慨太祖嘗抑之曰汝不
念讀書慕聖道而好乘汗馬擊劔此一夫之用何足貴
也課彰讀詩書彰謂左右曰丈夫一為衛霍將十萬騎
馳沙漠驅戎狄立功建號耳何能作博士邪太祖嘗問
諸子所好使各言其志彰曰好為將太祖曰為將奈何
對曰披堅執銳臨難不顧為士卒先賞必行罰必信太
祖大笑彰北征入涿郡界叛胡數千騎卒至時兵馬未

集唯有步卒千人騎數百匹用田豫計固守要隙虜乃

退散彰追之身自搏戰胡騎應弦而倒者前後相屬戰

過半日彰鎧中數箭意氣益厲乘勝逐北至於秦乾

桑乾

縣屬代郡今北虜居之號索干都

去代二百餘里長史諸將皆以為新

涉遠士馬疲頓又受節度不得過代不可深進違令輕

敵彰曰率師而行唯利所在何節度乎胡走未遠追之

必破從令縱敵非良將也遂上馬令軍中後出者斬一

日一夜與虜相及擊大破之斬首獲生以千數彰乃倍

嘗科大賜將士將士無不喜悅時鮮卑大人軻比能將
數萬騎觀望強弱見彰力戰所向皆破乃請服北方悉
平太祖嘗在漢中而劉備栖於山頭使劉封下挑戰太
祖罵曰賣履舍兒長使假子拒汝公乎待呼我黃鬚來
令擊之乃召彰彰晨夜進道西到長安而太祖已還從
漢中而歸彰黃鬚故以呼之

靈壽亭侯真嘗獵為虎所逐顧射之應聲而倒太祖壯
其鷙勇使將虎豹騎討靈丘賊拔之封靈壽亭侯

晉長沙厲王乂武帝第六子開朗果斷才力過人

吳昭義中郎將靜字幼臺堅之季弟堅始舉事靜糾合
鄉曲及宗室五六百人以為保障衆咸附焉策破劉繇
定諸縣進攻會稽遣人請靜靜將家屬與策會于錢塘
丞相大將軍都督中外諸軍事峻靜之曾孫也少便弓
馬精果膽決

偏將軍領丹陽太守翊大帝弟也驍悍果烈有兄策風
南齊豫章文獻王嶷太祖第二子有大成之量當桂陽

王範之役太祖出頓新亭壘拔嶷為寧朔將軍領兵衛
從範率士卒攻壘南嶷執白幡督戰屢摧却之及太祖
在領軍府嶷居清溪宅蒼梧王夜中微行欲掩襲宅內
嶷左右舞刀戟於中庭蒼梧從牆間窺見以為有備乃
去

長沙威王晃太祖第四子也少有武力為太祖所愛昇
明二年代兄映為寧朔將軍淮南宣城二郡太守初沈
攸之事起晃便弓馬多從武客赫奕都街時人為之語

曰煥煥蕭四繖世祖嘗幸鍾山晃從駕以馬稍刺道邊
枯蘗上令左右數人引之銀纏皆卷聚而稍不出乃令
晃復馳馬拔之應手便去每遠州獻駿馬帝輒令晃於
華林中調試之

魚復侯子響勇力絕人彎弓四斛力數在園池中帖騎
馳走竹樹下身無虧傷

曲江公遙欣為左將軍荊州刺史好勇聚畜武士以為
荆援

梁西昌侯藻武帝長兄懿之子天監初出為持節都督益寧三州諸軍事冠軍將軍益州刺史時天下草創邊徼未安州民焦僧護聚眾數萬據郫樊作亂藻年未弱冠集僚佐議欲自擊之或陳不可藻大怒斬于階側乃乘平肩輿巡行賊壘賊聚弓亂射矢下如雨從者舉楯禦箭又命除之繇是人心大安賊乃夜遁藻命騎追之斬首數千級遂平之進號信威將軍

豫章王綜武帝第二子也有勇力手制奔馬

廬陵王續武帝第五子也少英果膂力絕人馳射游獵
應發命中帝嘗嘆曰此我之任城也嘗與臨賀王正德
及胡貴通趙伯超等馳射帝大悅

永安侯確邵陵王綸之次子也少驍勇有文才嘗在第
中習騎射學兵法時人皆以為狂左右或以進諫確曰
聽吾為國家破賊使汝知之除祕書丞太子中舍人鍾
山之役確苦戰所向披靡羣虜憚之確每臨陣對敵意
氣詳贍帶甲據鞍自朝及夕馳驟往反不以為勞諸將

服其壯勇

河東王譽昭明太子之第二子也為湘州刺史幼而驍勇兼有膽氣能撫循士卒甚得衆心及被圍既久雖內外斷絕而備守猶固

綏建王大摯簡文之子也幼雄壯有膽氣及京師陷乃嘆曰大丈夫會當滅虜屬奶媪驚掩其口曰勿妄言禍將及大摯笑曰禍至此非繇此言

後魏西河公敦平文帝曾孫道武初從征名冠諸將後

征中山所向無前

扶風公處真烈帝之後也少以壯烈聞位殿中尚書吐
京胡曹僕渾等叛招引朔方胡為援處真與高涼王那
等討滅之

秦明王翰昭成帝次子少有高氣年十五便請征伐昭
成壯之使領騎二千及長統兵號令嚴明多有尅捷翰子
衛王儀少能舞劍騎射絕人道武幸賀蘭部侍從出入
登國初從破諸部有戰功儀膂力過人弓力將十石陳

留公稍大稱異時人云衛王弓桓王稍太武之初育也
道武喜夜召儀入曰卿聞夜喚乃不怪懼乎儀曰怪則
有之懼實無也

儀弟陰平王烈剛武有智畧元紹之逆百僚莫敢有聲
唯烈出詣紹詐與相附募執明元紹信之自延秋門出
遂迎立明元

烈弟觚勇烈有膽氣少與兄儀從道武侍衛左右使於
慕容垂垂末年政在羣下遂止觚以求賂道武絕之觚

率左右馳還

衛王孫禎膽氣過人太武時從征蠕蠕忽遇賊別部多
少不敵禎乃就山解鞍被馬以示有伏賊果疑而避之
常山王遵昭成帝孫少而壯勇不拘小節道武初有佐
命勲賜爵洛陽公慕容寶之敗也別率騎七百邀其歸
路繇是有參合之捷

陳留王虔昭成帝孫也姿貌魁偉武力絕倫每以常稍
細短大作之猶患其輕復綴鈴於刃下其弓力倍加常

人以其殊異於世代京武庫嘗存而志之虔嘗臨陣以
稍刺人遂貫而高舉又嘗以一手頓稍於地馳馬偽退
敵人爭取引不能出虔引弓射之一箭殺二三人搖稍
之徒亡魂而散徐乃令人取稍而去每從征討常先登
陷陣勇冠當時敵無衆寡莫抗其前者

河陽王曜道武子武藝絕人與陽平王熙等並督諸軍
講武衆服其勇

陽平王他道武帝孫性謹厚武藝絕人從大武討胡白

龍於河西屠其城別破餘黨斬首千級

安康縣伯均長子忻之性麤武有氣力釋褐定州平北府中兵叅軍

長壽子鸞以武藝著稱頗為北都大將

常山王素子可悉陵年十七從大武獵遇一猛獸陵遂空手搏之以獻帝曰汝才力絕人當為國立功立事勿如此也即拜內行阿干又從平涼州沮渠茂虔令一驍將與陵相擊兩槩皆折陵抽箭射之墜馬陵恐其救至

未及拔劍以刀戾其頸使身首異處帝壯之即日拜都
幢將

永昌王健明元帝次子姿貌魁壯大武襲蠕蠕越涿邪
山詔健殿後矢不虛發所中皆應弦而斃威震漠北健
子仁亦驍勇有父風大武奇之

魏興王融字叔融貌甚短陋驍武過人莊帝謀殺爾朱
榮以融為直閣將軍

任城王雲子嵩為左中郎將從孝文南伐齊將陳顯達

率衆拒戰嵩身備三仗免胄直前將士從之顯達潰斬
獲萬計嵩於爾日勇冠三軍

華山王鷲字孔雀文皇帝之後容貌魁壯腰帶十圍有
武藝木訥少言

北齊清河王岳神武從父弟初神武與四胡戰於韓陵
神武將中軍高昂將左軍岳將右軍中軍敗績賊乘之
岳舉麾大呼橫衝賊陣高祖方得迴師表裏奮擊因大破
賊

上黨剛肅王渙神武第七子天姿雄傑倂儻不羣雖在
童幼嘗以將畧自許神武壯而愛之曰此兒似我及長
力能扛鼎材武絕倫元象中封平原郡公文襄之遇賊
渙年尚幼在西學間宮中謹驚曰大兄必遭難矣彎弓
而出

蘭陵武王長恭一名孝瓘文襄第四子累遷并州刺史
突厥入晉陽長恭盡力擊之芒山之敗長恭為中軍率
騎五百再入周軍遂至金墉之下被圍甚急城上人弗

識長恭免胄示之面乃下弩手救之於是大捷武士共
歌謠之為蘭陵王入陣曲是也後為太尉與段韶討栢
谷又攻定陽韶病長恭總其衆前後以戰別封鉅鹿長
樂樂平高陽等郡公芒山之捷後主謂長恭曰入陣太
深失利悔無所及對曰家事親切不覺其遽然帝嫌其
稱家事遂忌之

安德王延宗文襄第五子以平陽之役後主自禦之命
延宗率右軍先戰城下擒周開府宗挺及大戰延宗以

麾下再入周軍莫不披靡諸軍敗延宗猶全軍延宗容貌
充壯坐則仰偃則伏人笑之乃赫然奮發氣力絕異馳
騁行陣勁挺若飛後禦周齊王於城北奮大稍往來督
戰所向無前

後周東平公神舉文帝族子膂力絕人彎弓數百斤能
左右馳射

莒莊公雒生少任俠尚武藝及壯有大度好施愛士北
州賢俊皆與之遊而才能多出其下葛榮破鮮于仲禮

乃以維生為漁陽王領德皇帝餘衆時人呼為維生王善撫將士帳下多驍勇至於陣戰莫有當其鋒者是以剋獲常寇諸軍爾朱榮定山東收諸豪傑遷晉陽維生時在虜中榮雅聞其名心憚之為榮所害

章武公遵少雄豪太祖愛之及入關遵嘗從征伐太祖討侯莫陳悅以遵為都督鎮原州及悅走故塞遵追斬之

杞簡公連臨敵果毅隨德皇帝追賊定州戰歿

齊王憲高祖第五子也武帝保定中憲為雍州牧及晉國公護東伐尉遲迥為前鋒圍雒陽憲與達奚武王雄等軍於邛山自餘諸軍各分守險要齊兵數萬人奄出軍後諸軍震駭並各退散唯憲與雄等率衆拒之而雄為齊人所敗三軍震懼憲親自督勵衆心乃安建德五年大舉東伐憲為前鋒憲渡汾而西及帝於玉壁帝又令憲率兵六萬還援晉州憲遂進軍營於涑水齊主攻圍晉州晝夜不息間諜還者或云已陷憲乃遣柱國越

王盛大將軍尉遲迥開府宇文神舉等輕騎一萬夜至
晉州憲進據蒙坑為其後援知城未陷乃歸涑水尋而
高祖東轅次於高顯憲率所部先向晉州明日諸軍總
集稍逼城下齊人亦大出兵陣於營南帝召憲馳往觀
之憲返命曰易與耳請破而後食帝悅曰如汝所言吾
無憂矣內史柳昂私謂憲曰賊亦不少王安得輕之憲
曰憲受委前鋒情兼家國掃此逋寇事等摧枯商周之
事公所知也賊雖衆其如我何既而諸軍俱進應時大

潰其後齊王遁走憲輕騎追之既及永安高祖續至齊人收其餘衆復據高壁及雒女砦高祖命憲攻雒女破之明日與大軍會於介休時齊主已奔鄴留其從兄安德王延宗據并州延宗因僭偽號帝圍其城憲攻其西面克之擒延宗以功封第二子質為河間王拜第三子寶一作貞為大將軍仍詔憲先驅趣鄴

汝南郡公慶衛王直鎮山南引為左右慶善射有膽氣好格猛獸直甚壯之後從武帝攻河陰先登攀堞與賊

短兵相接中石乃墜死而後蘇帝勞之曰卿勇可以賈人也復從武帝拔晉州齊兵大至慶與齊王憲輕騎覘卒為賊所窘憲挺身而出慶退據汾橋衆賊爭進慶射之所中人馬必倒賊乃稍却及拔高壁尅并州下信都禽高潛功並居最

隋蜀王秀高祖子有膽氣多武勇甚為朝士所憚

唐淮陽王道玄高祖從父兄子也武德初從太宗擊宋金剛於介州先登陷陣時年十五太宗壯之賞物千段

後討王世充頻戰皆捷竇建德至武牢太宗以輕騎誘賊令道玄率伏兵於道左會賊至追擊破之又從太宗轉戰於汜水麾戈陷陣直出賊後衆披靡復衝突而歸太宗大悅命副乘以給道玄又從太宗赴賊再入再出飛矢亂下箭如蝟毛猛氣益厲射人無不應弦而倒東都平拜維州總管後為劉黑闥所擒太宗嘗從容謂侍臣曰道玄終始從朕深入賊陣所向必尅意嘗企慕所以每陣先登蓋學朕也惜其年少不遂遠圖因為之流涕

贈左驍衛大將軍謚曰壯

江夏王道宗道玄從父弟也武德初從太宗平竇建德破王世充屢有殊效五年授靈州總管梁師都據夏州遣弟洛仁引突厥兵數萬至於城下道宗閉門拒守伺隙而戰賊徒大敗高祖聞而嘉之謂僕射裴寂中書令蕭瑀曰道宗今能守邊以寡制衆昔魏任城王彰臨戎却敵道宗勇敢有同於彼初突厥連於梁師都其都尉設入居五原舊地道宗逐出之振耀威武開拓疆界并

地千餘里邊人悅服貞觀三年為大同道行軍總管遇李靖襲破頡利可汗頡利以十餘騎來奔其部道宗引兵逼之徵其執送頡利以數騎夜奔匿於荒谷沙鉢羅懼馳追獲之遣使送於京師吐谷渾寇邊詔右僕射李靖為崑丘道行軍大總管道宗與吏部尚書侯君集為之副賊聞兵至走入嶂山已行數千里諸將議欲息兵道宗固請追討李靖然之而君集不從道宗遂率邊師并行倍道去大軍十日追擊之賊據險苦戰道宗潛遣

十餘騎踰山襲其後賊表裏受敵一時奔潰十四年大軍討高麗令道宗與李勣為前鋒濟遼水尅蓋牟城逢賊兵大至軍中僉欲深溝保險待太宗至徐進道宗曰不可賊赴急遠來兵實疲頓恃衆輕我一戰必摧昔耿弇不以賊遺君父我既職在前軍當須清道以待輿駕李勣然之乃與壯士數十騎直衝賊陣左右出入勣同

合擊大破之

太宗既親討高麗初遣營州都督張儉統輕騎先渡遼觀賊形勢儉懼敵不敢深入

道宗固請將百騎覘賊太宗許之因問往還幾日對曰住十日返十日周覽十日總經一月望謁陛下遂秣馬

東兵備歷險阻直發遼東城南山觀其地形險易安營
置陣之所及還賊已引兵過長城斷其路道宗斬關而
出如期謁見太宗嗟嘆曰育育之
勇何以過此賜金五十斤絹千匹

梁柳王友裕太祖之長子也氣貌雄傑幼即明敏嘗從
征伐破黃巢於陳又破賊於寬甸後討蔡寇於激水又
戰於斤溝秦宗權來寇也領軍馬翼帝於府西板橋大
勝之又從破張旺於封丘南破郟之范縣寨擒都將尹
萬榮敗魏卒於黎陽臨河

後唐贈太保從璟明宗長子性忠勇沈厚摧堅陷陣人

罕偕焉

晉韓王暉高祖從弟高祖初為河東節度使張敬達之
圍晉陽也高祖署暉為突騎都將嘗引所部出敵之不
意深入敵戰雖夷傷流血矢鏃貫骨而辭氣益勵高祖
壯之

剛正

夫有託景宸極維翰帝室奮立剛毅克揚威望非天資
挺特內韞忠亮臨事有守居正不撓又曷能申疾風勁

草之節彰烈火真金之操啓發憤悱昭著茂烈者乎繇
漢而還可以槩舉至有外屬彊熾怙寵干紀權臣跋扈
放命肆虐而能激昂正說折挫驕勢嫉邪蹈險執義不
迴乃至恪守官次靡受私請修明職事弗畏強禦惡無
禮於君側折諸短於言下賦性質重未嘗笑謔斯亦各
秉志向以樹英聲者耳

漢朱虛侯章齊王肥子也高后稱制立諸呂為三王擅
權用事明年章入宿衛章年二十有氣力忿劉氏不得

職嘗入侍宴飲高后令章為酒吏章自請曰臣將種也

請得以軍法行酒高后曰可酒酣章進歌舞已而曰請

為太后言耕田

欲申諷諭也

高后兒子畜之

比之於子

笑曰顧乃

父知田耳

顧念也乃汝也汝父謂高帝也

若生而為王子安知田乎章

曰臣知之太后曰試與我言田意章曰深耕概種立苗

欲疏

概稠也概種者言多生子孫也疏立者四散置之今為藩輔也

非其種者鋤而去

之

以斥諸呂也

太后默然頃之諸呂有一人醉亡酒

避酒而逃章

追捕劔斬之而還報曰有亡酒一人臣謹行軍法斬之

太后左右大驚業已許其軍法亡以罪也因罷酒自是後諸呂憚章雖大臣皆依朱虛侯劉氏為彊

魏任城王彰初治鄆陵墻薄使治中牟及文帝受禪因封為中牟王是後大駕幸許昌北州諸侯上下皆畏彰之剛嚴每過中牟不敢不速

晉成都王穎為車騎將軍賈謚嘗與皇太子博爭道穎在坐厲聲呵謚曰皇太子國之儲君賈謚何得無禮謚懼繇此出穎為平北將軍鎮鄴

嗣譙王恬為御史中丞值海西廢簡文帝登祚未解嚴
大司馬桓溫屯中堂吹警角恬奏劾溫大不敬請科罪
溫視奏嘆曰此兒乃敢彈我真可畏也恬忠直有幹局
在朝憚之

嗣譙王尚之為前將軍兄弟俱典兵後將軍元顯寵倖
張法順每宴會坐起無別尚之入朝正色謂元顯曰張
法順驅走小人有何才異而暴被拔擢當今聖世不宜
如此元顯默然尚之又曰宗室雖多規諫者少王者尚

納芻蕘之言况下官與使君骨肉不遠蒙眷累世何可
坐視得失而不盡言因叱法順令下舉坐失色尚之言
笑自若元顯深銜之後符下西府令出勇力二千人尚
之不與曰西藩濱接荒餘寇虜無嘗兵止數千不足戍
衛無復可分撤者元顯尤怒

東安王繇性剛毅有威望

後魏華山王鷲字孔雀為大司馬侍中鷲木訥少言性
方厚每息直省闔雖暑月不解衣冠曾於侍中高岳之

席咸陽王坦恃力使酒衆皆下之坦謂鷲曰孔雀老武
官何因得王鷲答曰斬反人元禧首是以得之衆皆失
色鷲怡然如故禧坦之父也

艾陵伯萇性剛毅雖有吉慶未嘗開口而笑孝文遷都萇
以代尹畱鎮懷朔領大將因別賜萇酒雖拜飲而顏色
不泰帝曰聞公一生不笑今方隔山河當為朕笑竟不
可得

美陽公暉業為特進中書監錄尚書事齊文襄執政嘗

問之曰比何所披覽對曰所尋伊霍之傳不讀曹馬之書

建中伯志字猛畧為雒陽令不避彊禦與御史中尉李彪爭路俱入見面陳得失彪言御史中尉避承華車蓋駐論道鼓劍安有雒陽縣令與臣抗衡志言神鄉縣主普天之下誰不編戶豈有俯同衆官趨避中尉孝文曰雒陽我之豐沛自應分路揚鑣自今以後可分路而行及出與彪折尺量道各取其半帝謂邢巒曰此兒竟可所謂

王孫公子不鏤自彫巒曰露竹霜條故多勁節非鸞則鳳其在本枝也

東平王字建扶性耿介有氣節宣武即位累遷給事黃門侍郎時茹皓始有寵百僚微憚之帝曾於山陵還詔建扶陪乘又命皓登車皓褰裳將上建扶諫帝推之令下皓恨建扶失色當時壯其忠蹇後為度支尚書時宣帝委政於高肇宗室傾憚唯建扶與肇抗衡先自造棺置於廳事意欲與棺詣闕論肇罪惡自殺切諫肇聞

而惡之

東河縣公順任城王澄之子起家為給事中時尚書令
高肇帝舅權重天下人士望塵拜伏順曾懷刺詣肇門
門者以其年少答云在坐大有貴客不肯為通順叱之
曰任城王兒可是賤也及見直往登床捧手抗禮王公
先達莫不怪懼而順辭吐傲然若無所覩肇謂眾賓曰
此兒豪氣尚爾况其父乎及出肇加敬送之為給事黃
門侍郎時領軍元乂威勢尤盛凡有遷授莫不造門謝

謁順拜表而已曾不詣又謂順曰卿何得聊不見我
順正色曰天子富於春秋委政宗輔叔父宜以至公為
心舉士報國如何賣恩責人私謝豈所望也至於朝論
得失順嘗鯁言正議曾不阿旨繇此見憚出除平北將
軍常州刺史順謂又曰北鎮紛紜方為國梗桑乾舊都
根本所係請假都督為國捍屏又疑難不欲授以兵官
謂順曰此朝廷之事非我所裁順曰叔父既握國柄殺
生繇已自言天之歷數應在我躬何得復有朝廷也又

彌忿憚之又既解領軍順累遷侍中初中山王熙起兵討元乂不果而誅及靈太后反政乃得改葬順侍坐西遊園因奏太后曰臣昨往看中山家葬非惟宗親哀其冤酷行路士女見其一家七喪皆為潜然莫不酸泣乂妻時在太后側順指之曰陛下奈何以一妹之故不伏元乂之罪使天下懷冤太后嘿然不語後營州城民就德興反使尚書盧同往討之大敗而返屬侍中穆紹與順侍坐因語同之罪同先有近宅借紹紹頗欲為言順

勃然曰盧同終將無罪太后曰何得如侍中之言順曰
同有好宅與要勢侍中豈慮罪也紹慚不敢復言後徐
紇間順於靈太后出順為護國將軍太常卿順奉辭於
西遊園紇侍側順指謂靈太后曰此人魏之宰詬魏國
不滅終不死亡紇脅肩而出順遂抗聲叱之曰爾刀筆
小人正堪為机案之吏寧應忝執戟虧我彛倫遂振衣
而起靈太后默而不言尋除吏部尚書兼右僕射與城
陽王徽同日拜職舍人鄭儼於止車門外先謁徽後拜

順順怒曰卿是佞人當拜佞王我是直人不受曲拜儼
深懷謝順曰卿是高門子弟而為北宮幸臣僕射李思
沖尚與王維誠同傳以此度之卿亦應繼其卷下見者
為之震動而順安然自得時三公曹令史朱暉素事錄
尚書高陽王雍雍欲以為廷尉評頻煩托順順不為用雍
遂下命用之順投之於地雍聞大怒昧爽坐都廳召尚
書及丞郎畢集欲待順至於衆挫之順日高方至雍攘
袂撫几而言曰身天子之子天子之叔天子之相四海

之內尊親莫二元順何人以身成命投棄於地順鬚髯
俱張仰面看屋憤氣奔涌長歎而不言久之搖一白羽
扇徐而謂雍曰高祖遷宅中土創定九流官方清濁軌
儀萬古而朱暉小子身為省吏何合為廷尉清官殿下
既先皇同氣宜遵成旨自有恒規而復踰之也雍曰身
為丞相錄尚書如何不得用一人為官曰庖人雖不治
庖尸祝不得越樽俎而代之未聞有別旨令殿下參選
事順又厲聲曰殿下必如是順當依事奏聞雍遂笑而

言曰豈可以朱暉小人便相忿恨遂起呼順入室與之極飲順之容貌不撓皆此類也

北齊趙郡王叡累拜太尉監與馮翊王潤安德王延宗及元文遙奏後主云和士開不宜仍居內任并入奏太后因出士開為兗州刺史太后曰士開舊經驅使欲畱過百日叡正色不許數日之內太后數以為言有中官要人知太后密旨謂叡曰太后意既如此殿下何宜苦違叡曰吾國家事重死且不避若貪生苟全令國家擾

攘非吾志也况受先皇遺旨委寄不輕今嗣主幼冲豈可使邪臣反側不守之以正何面戴天遂重進言詞理懇切太后令酌酒賜叡叡正色曰今論國家大事非為卮酒言訖便出及明日入朝妻子咸諫止之叡曰自古忠臣皆不顧身今社稷事重吾當以死効之豈容令一婦人傾危宗廟且和士開何物豎子如此縱橫吾寧死事先皇不忍見朝廷顛沛至殿門又有人曰願殿下勿入慮有危變叡曰吾上不負天死亦何恨入見太后太

后復以為言叡執之彌固出至永巷遇兵被執送華林園於雀離佛院令劉桃枝拉而殺之

樂安王勣性剛直有才幹甚為時人所重斛律明月雅敬之每有征伐則引之為副遷侍中尚書右僕射及後主為周師所敗勣奉太后歸鄴時宦官放縱儀同荀子溢尤稱寵幸勣將斬之以徇太后救之乃釋劉文殊竊謂勣曰子溢之徒言成禍福何得如此勣攘袂曰今者西寇日侵朝貴多叛繇此輩弄權致使衣冠解體若得

今日殺之明日受誅無所恨也文殊甚愧

唐惠文太子範睿宗子玄宗時王毛仲等本起微賤皆
崇貴傾於朝廷諸王每相見假立引待獨範見之色莊
嗣吳王囂貞元中為宗正卿性介直每與人言論好面
折其短

冊府元龜卷二百七十一

欽定四庫全書

冊府元龜卷二百七十二 宋 王欽若等 撰

宗室部

令德

夫體自帝室齒於宗戚處有惇叙之美出有藩翰之重
自非挺信厚之質流愷悌之譽則何以焜耀民望表儀
公族哉麟趾以來封建尤盛乃有粹和中積淑美兼著
事神撫人而咸悅守法奉上而匪懈樹善以濟物推誠

而待下勞謙不伐純儉無驕體仁好施居簡多恕行已
以周慎處事以方正寬厚以容衆賢明而通理是皆宗
室之英本枝之秀足以隆王國之垣屏藹策書之徽譽
者已蓋夫立愛維親雖古之義又曷嘗不建賢尚德以
成固本之義歟

周公旦者多才多藝能事鬼神

衛康叔封舟季載周公母弟也皆有馴行於是周公舉
康叔為周司寇舟季為周司空以佐成王治皆有令名

於天下

蔡侯胡叔度之子也度既遷而死胡乃改行率德馴善
周公聞之而舉胡以為魯卿士魯國治

漢陽城侯德楚元王曾孫地節中以親親行謹厚封為
陽城侯子安民為郎中右曹宗家以德得官宿衛者二

十餘人德寬厚好施生

言好施恩惠於人而保全之

每行京兆尹事

多所平反罪人

反幡也幡罪人辭使從輕也

家產過百萬則以振昆

弟賓客飲食曰富民之怨也宗正向初以行修飭擢為

諫大夫

淮南王安厲王之子為人好書鼓琴不喜弋獵狗馬馳騁亦欲行陰德拊循百姓流名譽

河間獻王德修學好古及薨中尉常麗以聞曰王身端行治溫仁恭儉篤敬愛下明知深察惠於鰥寡大行令奏謚法曰聰明睿知曰獻宜謚曰獻

楚孝王囂成帝河平中入朝時被疾天子聞之下詔曰蓋聞天地之性人為貴人之行莫大於孝楚王囂素行

孝順仁慈之國以來二十餘年纖介之過未嘗聞朕甚嘉之

後漢城陽恭王祉行淳厚宗室皆敬之

宜春侯正為人謙遜

東海項王肅恭王彊之子性謙儉循恭王法度肅子孝王臻性敦厚有恩和睦兄弟恤養孤弱至孝純備仁義兼著

楚思王孫般宣帝之玄孫也初宣帝封子囂於楚是為

孝王孝王生思王衍衍生王紆紆生般自囂至般積累
仁義世有名節而紆尤慈篤般子愷愷子茂皆以禮讓
至三公也

沛王輔光武之子矜嚴有法度在國謹節終始如一稱
為賢王明帝愛重數加賞賜

琅邪孝王京光武之子京性恭孝好經學明帝尤愛幸
賞賜恩寵殊厚莫與為比

東平王蒼光武之子永平十一年蒼朝京師月餘還國

明帝遣使手詔國中傅曰日者問東平王處家何等最樂王言為善最樂其言甚大副是腰腹矣蒼腰帶十圍故明帝言之

彭城王恭敦厚威重舉動有節度吏人愛敬之恭子孝王和敬賢樂施國中愛之

魏鄧哀王冲幼才敏太祖尤愛之冲每見當刑者輒探覩其冤枉之情而微理之及勤勞之吏以過誤觸罪嘗為太祖陳說宜寬宥之辯察仁愛與性俱生

吳丹徒侯桓字叔武堅族子河之子器懷聰朗大帝嘗

稱為宗室顏淵

都鄉侯松丹陽太守翊之子善與人交輕財好施鎮巴
丘數咨陸遜以得失嘗有小過遜面責松松意色不平
遜觀其少釋謂曰君過聽不以某鄙數見訪及是以承
來意進盡言便變色何也松笑曰屬亦自忿行事有此
豈有望也

假節開府慮大帝子也性聰體達所向日新以皇子之
尊富於春秋遠近嫌其不能留意及至臨事遵奉法度

延納師友過於衆望

晉安平王孚宣帝次弟也孚溫厚謙遜性通恕以貞白自立未嘗有怨於人武帝元會詔孚乘輿車上殿帝於阼階迎拜既坐帝親奉觴上壽如家人禮帝每拜孚跪而止之又給以雲車輦青蓋車孚雖見尊寵不以為榮常有憂色

高密王泰性廉靜不近聲色事親恭謹居喪哀戚謙虛下物為宗室儀表當時諸王惟泰及下邳王晃以節制

見稱雖並不能振施其餘莫能比焉

孝王畧秦之子也孝敬慈順小心下士少有父風

東海獻王越秦之子也少有令名謙虛持布衣之操為
中外所宗

琅邪王伉宣帝拜大將軍開府儀同三司既戚屬尊重
加有平吳之功克己恭儉無矜滿之色僚吏盡力百姓
懷化

扶風王駿清貞守道宗室之中最為俊望

齊獻王攸字大猷少而岐嶷及長清和平允親賢好施才望出武帝之右宣帝每器之武帝時攸雖未之國文武官屬下至士卒分租賦以給之疾病死喪賜與之而時有水旱國內百姓則加振貸須豐年乃責十減其二國內賴之及為驃騎將軍時驃騎當罷營兵兵士數千人戀攸恩德不肯去遮京兆主言之帝乃還攸兵攸以禮自拘鮮有過事就人借書必手刊其謬然後反之雖武帝亦憚之每引之同處必擇言而後發

長沙王又開朗果斷虛心下士甚有名譽

河間王顥少有清名輕財愛士與諸王俱來朝武帝嘆
顥可為諸國儀表

會稽文孝王道子少以清淡為謝安所稱

下邳王晃孝友廉貞謙虛下士甚得宗室之稱

譙王承為東海太守有犯夜者為吏所拘承問其故答
曰從師受書不覺日暮承曰鞭撻寧越以立威名非政
化之本使吏送令歸家其從容寬恕如此又小更有盜

池中魚者網紀推之承曰文王之囿與衆共之池魚復何足惜耶

宋長沙王道憐子義宗愛士樂施兼好文籍世以此稱之義宗子秉泰始中累遷吏部尚書時宗室雖多才能甚寡秉少自砥束甚得朝野之譽為太宗所委

臨川王義慶性謙虛簡素寡嗜欲受任歷藩無浮淫之過

建平王寵少而閒素篤學文籍為人謙儉周慎明曉政

事

南齊豫章王嶷性汎愛不樂聞人過失左右有投書相告置鞞中竟不視取火焚之齊庫失燒荊州還資評直三千餘萬主局各杖數十武帝遣嶷拜陵還過延陵季子廟觀沸井有水牛突部伍直兵執牛推問不許取絹一匹橫繫牛角放歸其家為治存寬厚故得朝野歡心及薨羣吏中南陽樂藹彭城劉繪吳郡張稷最被親禮藹與竟陵王子良牋曰道德以可久傳聲風流以浸遠標

稱雖復青簡締芳未若玉石之不朽飛翰圖藻豈伊雕
篆之無沫丞相冲粹表於天真淵照殆乎機象經邦緯
民之範體國成務之規故以業茂惟賢功高則哲神輝
眇邈睿算不遺感纏奉車恨百留滯下官夙稟名節懷
恩軫慕望隧結哀輒欲率荆江湘三州僚吏建碑壟首
庶徽猷有述茂則方存昔子香淳德畱銘江介鉅平遺
烈墮淚漢南汎道尊前往惠積聯絲者哉下官今便反
假無繇躬事刊斲須至西州鳩集所資託中書侍郎劉

繪營辦藹又與右率沈約書曰夫道宣餘烈竹帛有時
先朽德孚遺事金石更非後亡丞相獨秀生民旁照日
月標勝丘園素履穆於忠義譽應華衮功迹著於弼諧
無得而稱理絕昭載若夫日用閒寂雖無取於錙銖歲
功宏遠諒有寄於衡石竊承貴州士民或建碑表俾我
荆南閱感無地且作紀江漢道基分陝衣冠禮樂咸被
後昆若其望碑盡禮我州之舊俗傾壘罷肆鄙土之遺
風庶幾弘烈或不泯墜荆江湘三州策名不少並欲各

率毫釐少申景慕斯文之託歷選惟疑必待文蔚辭宗
德僉茂履非高明而誰豈能騁無愧之辭訓式瞻之望
吾西州窮士一介寂寥恩周榮譽澤遍衣食永惟道廕
日月就遠緬尋遺烈觸目推心嘗謂福齊南山慶鍾仁
壽吾儕小人貽塵帷蓋豈圖一旦遂投此請約答曰丞
相風道弘曠獨秀生民凝猷盛烈方範伊旦慙遺之感
朝野同悲承當刊石紀功傳華千載宜須盛述實允來
談郭有道漢末之匹夫非蔡伯喈不足以偶三絕謝安

石素族之台輔時無麗藻迄乃有碑無文文獻王冠冕
彛倫儀刑寓內自非一世辭宗難或與此約乃問開鄙
人名不入第歛酬令旨便是以禮許人聞命慙顏已不
覺汗之沾背也建武中第二子子恪託約及太子詹事
孔穉珪為文

臨川王映為揚州刺史國家初創映以少年臨神州吏
治聰敏府州曹局皆重足以奉禁令自宋彭城王義康
以後未之有也武帝嘗問映居家何事映曰正使劉獻

講禮顧越講易朱廣之講莊老臣與一二諸彥兄弟友
生時復擊贊以此為樂帝大賞之他日謂豫章王嶷曰
臨川為善遂至於斯嶷曰此大司馬公之次弟安得不爾
帝仍以玉如意指嶷曰未若皇帝之次弟為善最多也
嶷常戒諸子曰凡富貴少不驕奢以約失之者鮮矣漢
世以來侯王子弟以驕恣之故大者滅身喪族小者削
奪邑地可不戒哉映應接賓客風韻韶美及薨朝野莫
不惋惜焉

鄱陽王鏘和悌美令有寵於武帝在官理事無壅當時稱之

始興王鑑為益州刺史不重華飾器服清素有高士風與記室參軍蔡仲熊登張儀樓商畧先言徃行及蜀土人物鑑言辭和辨仲熊應對無滯當時以為盛事

南平王銳為左民尚書朝直勤謹未嘗屬疾上嘉之十年出為持節都督湘州諸軍事以賞銳

宜都王鏗清恬有學行為南豫州刺史都督二州軍事

雖未經庶政而雅得人心及鎮姑孰於時人發桓温女冢得金巾箱織金篋為之嚴器又有金蠶銀繭等物甚多條以啓聞鬱林勅以物賜之鑑曰今取徃物後取今物如此循環豈可熟念使長史蔡約自往修復織毫不犯永明中制諸王年未三十不得畜妾及武帝晏駕後有勸取左右者鑑曰在內不無使役既先遺旨何忍而違

竟陵王子良少有清尚京邑大水吳興偏劇子良開倉

賑救貧病不能立者第北立廨收養給衣及藥子良每
勸人善未嘗厭倦以此終致盛名子良薨故吏范雲上
表為子良立碑事不行

南豐縣伯赤峇大祖從祖弟也歷官為奉朝請以和謹
為太祖所知

南康王子通理性慷慨慕立功名每讀書見忠臣烈士
未嘗不廢卷曰一生之內當無愧古人

梁文宣侯尚之敦厚有德器仕齊為司徒建安王中兵

叅軍一府稱為長者琅邪王僧虔尤善之每事多與議
決至天監初追謚文宣侯

吳平侯景才辨識斷益政佐時蓋宗室令望景子勵弱
不好弄喜愠不行於色性率儉而器度寬裕左右嘗將
羹正甑前翻之顏色不異徐呼更衣

長沙元王弟藻性謙退不求聞達善屬文詞尤好古體
自非公讌未嘗妄有所為縱有小文成輒棄本頻蒞數
鎮民吏稱之推善下人嘗如弗及性恬靜獨處一室床

有膝痕宗室衣冠莫不楷則嘗以爵祿太過每思屏退
門庭閒寂賓客罕通太宗尤敬愛之

桂陽王象容止閒雅簡於交遊位丹陽尹始親庶政舉
無失德朝廷稱之

臨川靖惠王宏性寬和篤厚在州二十餘年未嘗以吏
事接郡縣世稱其長者

安成王秀性方靜雖左右近侍非正衣冠弗之見繇是
親友及家人咸敬焉秀為平南將軍江州刺史將發主

者取堅船以為齋舫秀曰吾豈愛財而不愛士教所絲以牢者給叅佐下者載齋物既而遭風齋舫遂破秀有容觀每在朝百寮目為仁恕喜愠不形於色左右嘗以石擲殺所養鵠齋師請案其罪秀曰吾豈以鳥傷人在京師旦臨公事厨人進食誤而覆之去而登車竟朝不飯亦弗之誚也秀與高祖布衣昆弟及為君臣小心畏敬過於疎賤者高祖益以此賢之及薨故佐吏夏侯亶等表立墓碑詔許焉當時高才遊王門者東海王僧孺

吳郡陸倕彭城劉孝標河東裴子野各製其文古未之有也

南平元襄王偉性多恩惠尤愍窮乏常遣腹心左右歷訪里閭人士貧困吉凶不舉者即遣贍卹平原王曼穎亡家貧無以殯友人江革徃哭之其妻兒對革號訴革曰建安王當知必為營理言未訖偉使至給其喪事得周濟焉每祁寒積雪則遣人載樵米隨乏絕者即賦給之

鄱陽忠烈王恢通恕輕財好施凡歷四州所得俸祿隨而散之恢子範温和有氣識為衛尉卿每夜自巡警武帝喜其勞苦

邵陵王綸武帝第六子輕財愛士不競人利府無儲積間有輒求既得即散士亦以此歸之

武陵王紀少而寬和喜怒不形於色

後梁安平王巖性仁厚善於撫接歷侍中荊州刺史尚

書令

東平王岌性敦和而好學

義興王巖幼有令德能屬文時為明帝所愛

陳始興郡王伯茂性聰敏好學謙恭

都陽王伯山舉止閒雅喜愠不形於色

永陽王伯智少敦厚有器局

尋陽王叔儼性凝重舉止方正

後魏華山王鷲有武藝木訥少言性方厚每息直省闕
雖暑月不解衣冠

松滋侯子華為齊州刺史在官不為矯潔之行

陽平王熙聰達有雅操為宗屬所欽重

樂平王丕少有才幹為世所稱明元愛其器度特優異之

樂安王範為長安鎮都大將謙恭惠下雅性撫納百姓稱之

東平王翰大武之子初封秦王拜侍中中軍大將參軍典都曹事忠貞雅正百寮憚之

淮陵侯大頭性謹密文成甚重之

常山王素宗屬之懿而年老文成每引入訪以政事固辭疾歸第雅性方正居官五十載終始若一時論賢之武昌悼王鑒沈重少言寬和好士

京兆王繼寬和容裕號為長者

繼子羅字仲綱為散騎常侍雖父兄貴盛而虛已謙退
恂恂接物

彭城王勰姿性不羣小心謹慎初無過失雖閒居宴處

亦無慢色情容愛敬儒彥傾心禮待清正儉素門無私
謁性仁孝咸陽王禧謀反被害後諸子每乏衣食唯總
歲中再三賑給之

清河王懌寬仁容裕喜怒不形於色

河間公子蘭以忠謹見寵孝文初賜爵建陽子

京兆王子推孫綜寬和有度量美容貌風望儼然得喪之間
不見於色性清儉不營產業身死之日家無餘財

趙郡王謚弟譚性頗強立少為宗室所推敬

高陽王雍子叡輕忽榮利愛翫琴書起家拜通直散騎
侍郎

廣陽簡王建子嘉少沈敏喜愠不形於色

任城王澄子順宣武帝時四方無事國富民康豪貴子
弟率以朋遊為樂而順篤志愛古性審諤淡於利

北齊平陽靖翼王淹性沈謹以寬厚稱

齊安王廓字仁弘性長者無過行

趙郡王琛除使持節都督定州刺史推誠撫納拔用士

人甚有聲譽

北平王貞沈審寬恕武成曰此兒得我鳳毛

清河王岳長而敦直沈深有器量

蘭陵王長恭嘗入朝而僕從盡散唯有一人長恭獨還
無所譴罰

後周邵公導顯第二子也導為大將軍性寬明善撫御
凡所引接人皆盡誠臨事敬慎常若不及太祖每出征
討導常居守深為吏人所附朝廷亦以此重之

幽公廣文帝曾姪孫時晉公諸子及杞公亮等服翫侈靡踰越制度廣獨率繇禮則朝野稱焉

虞國公仲子興性弘厚有志度雖流離世故而風範可觀

廣川公測性仁恕好施在雒陽之日曾被竊盜所失物即其妻陽平公主之衣服州縣擒盜并物俱獲測恐此盜坐之以死不認焉遂遇赦免盜既感恩請為測左右及測從孝武西遷事極狼狽此人亦從測入關竟無異

志測弟深少喪父事兄甚謹從弟神譽神慶幼孤深撫
訓之義均同氣世亦以此稱之

東平公神舉蒞職當官每著聲績兼好施愛士以雄豪
自居故得任兼文武聲彰內外百寮無不仰其風則先
輩舊齒至於今稱之

隋穆王瓚世有令名於當世時人號曰楊三郎

衛昭王爽有器局所治甚有聲

右衛將軍處綱高祖族父為性質直在官宏濟亦為當

時所稱

秦孝王俊伐陳之役以為山南道行軍元帥督三十總
管水陸十餘萬屯漢口為上流節度陳將周羅暉荀法
尚等以勁兵數萬屯鸚鵡洲總管崔宏度請擊之俊慮
殺傷不許羅暉亦相率而降於是遣使奉章詣闕垂泣
謂使者曰謬當推轂竟無尺寸之功比多慙耳上聞而
喜之

上開府達為人弘厚有局度楊素每言曰有君子之貌

兼君子之心者惟楊達耳

唐江夏王道宗故慕賢士不以地勢凌人宗室中唯道宗及河間王孝恭昆季最為當代所重

淮陽王道玄性謹厚好學多武藝進止閒雅

廬江王瑗敦尚儒雅為公子而勵布衣之操

河間王孝恭少沈敏有識量性寬厚以仁孝見稱太宗甚親顧之諸宗室中莫與為比然宗退讓無矜伐驕貴之色

韓王元嘉閨門修整有類寒素士大夫其修身潔已內外如一諸王莫能及者唯霍王元軌抑其次焉

元嘉子譔少以才行見知諸王子之中與琅邪王冲為一時之秀凡所交結皆當代名流

霍王元軌謙慎自守與物無忤為人不妄接士在徐州唯與處士劉元平為布衣之交或問元平王之所長元平曰無長問者恠而復之元平曰夫人有短所以見其長至於霍王無所不備吾何以稱之哉嘗使國令徵封

今日請依諸國賦物貨易取利元軌曰汝為國今當正
吾失乃說吾以利邪拒而不納元軌初封吳王太宗嘗
問羣臣曰朕子弟孰賢侍中魏徵對曰臣愚闇不盡知
其能唯吳王數與臣言未嘗不自失太宗曰朕亦器之
卿以為前代誰比徵曰經學大雅亦漢之間平也繇是
寵遇彌厚因令娶徵女焉

同安郡王珣修身淳謹性自矜貴閨門之內默如也

信安郡王禕居家嚴整善訓諸子皆有令名禕子恒以

門蔭早仕質性簡淡好古慕善在宗室中推為循良
榮王琬素有雅稱風格秀整祿山反以琬為元帥數日
冕於時士庶冀琬有所成功既殂謝遠近咸失望焉
嗣吳王巖為宗正卿恤孤遺甥姪友愛過人深為士大
天之有禮教者稱慕

高平王道立曾孫涵簡素恭慎有名宗室官至右僕射
鄭王曾孫勉為太子太師真率素淡好古尚竒清廉簡
易為宗臣之表勉二子纘納皆廉介有節

後唐武皇季弟克寧凡征行無不衛從於昆仲之間最推仁孝小心恭謹武皇尤友愛之

晉楚王重信歷事後唐明宗及閔帝末帝不恃貴戚能克已復禮嘗恂恂如也甚為時論所稱

韓王敬暉為曹州防禦使廉愛卹下不營財利不好妓樂部人安之

漢魏王承訓少弘厚美姿儀從帝在藩邸輯睦宗親接下僚友有士君子之風高祖器之每遣從帝主帳下親

軍軍中有便宜事則馳以入奏奏必稱旨屢有恩錫嘗
嘆曰此諸侯賢子弟也少帝時累官至檢校司空及義
旗南向贊開創之業人皆服其規畧車駕入汴命為赤
尹尹正之務委親決之每因問安事有利於國者必具
以聞帝帝喜而納之及杜重威叛援帝幸鄴以為東都
留守俾之監撫內外咸畏而愛之及薨帝左右公卿大
夫聞之者無不流涕

冊府元龜卷二百七十二

欽定四庫全書

冊府元龜卷二百七十三 宋 王欽若等 撰

宗室部

智識

智者心之符天下之達德也大則周物而不遺小則見
事於未兆折獄辨惑存乎明識而振振公族源深憑厚
天姿英異不亦多乎繇漢已來可得而舉或神鋒昭朗
智慮淵妙竒謀先見越出世類至於封章奏議練達治

體者左右應對昭合事機決政務而撥其煩閱簿領而糾其繆權宜以救急精辨而垂裕逮夫明哲保身卷舒跡道觸類而長其流實潔非夫天下之至精又孰能與於此也

漢陽城侯德有智畧少時數言事召見甘泉宮武帝謂

之千里駒

言若駒馮可致千里也
年齒幼少故謂之駒

後漢北海靖王興為人有明畧為弘農太守明帝器重興每有異政輒乘驛問焉

興子敬王睦少好學博通書傳中興初禁網尚濶而睦

性謙恭好士千里交結自名儒宿德莫不造門繇是聲

價益廣永平中法憲頗峻睦乃謝絕賓客放心音樂然

性好讀書嘗為愛翫歲終遣中大夫奉璧朝賀

中大夫王國官

也大夫比六百石掌奉王使京都奉璧賀正月及使諸國本皆持節後去節召而謂之曰朝

廷設問寡人

朝廷謂天子也

大夫將何辭以對使者曰大王忠

孝慈仁敬賢樂士臣雖螻蟻敢不以實睦曰吁子危我

哉此乃孤幼時進趣之行也

東觀記續漢書並云是吾幼時狂恣之行也

大

夫其對以孤襲爵以來志意衰惰聲色是娛犬馬是好使者受命而行其能屈伸若此

清河王慶中傅衛訢私為臧盜千餘萬詔使按理之并責慶不舉之狀慶曰訢以師傅之尊選自聖朝臣愚惟知言從事聽不甚有所糾察章帝嘉其對悉以訢臧財賜慶

魏陳思王植上疏陳審舉之義曰臣聞天地協氣而萬物生君臣合德而庶政成五帝之世非皆知三季之末

非皆愚用與不用知與不知也既時有舉賢之名而無得賢之實必各援其類而進矣諺曰相門有相將門有將夫相者文德昭者也將者武功烈者也文德昭則可以輔國朝致雍熙稷契夔龍是也武功烈則可以征不庭威四夷南仲方叔是也昔伊尹之為滕臣至賤也呂尚之處屠釣至陋也及其見舉於湯武周文誠道合志同玄謀神通豈復假近習之薦因左右之介哉書曰有不世之君必能用不世之臣用不世之臣必能立不世

之功殷周二王是也若夫齷齪近步遵常守故安足為
陛下言哉故陰陽不和三光不暢官曠無人庶政不整
者三司之責也疆場騷動方隅內侵沒軍喪衆干戈不
息者邊將之憂也豈可虛荷國寵而不稱其任哉故任
益隆者負益重位益高者責益深書稱無曠庶官詩有
職思其憂此其義也陛下體天貞之淑聖登神機以繼
統冀聞康哉之歌偃武修文之美而數年以來水旱不
時民困衣食師徒之發歲歲增調加東有覆敗之軍西

有殪歿之將至於蚌蛤浮翔於淮泗鼪鼯謹譁於林木
臣每念之未嘗不輟食而揮餐臨觴而搯腕矣昔漢文
發代疑朝有變宋昌曰內有朱虛東牟之親外有齊楚
淮南琅邪此則磐石之宗願王勿疑臣伏惟陛下遠覽
姬文二虢之援中慮周成召畢之輔下存宋昌磐石之
固昔騏驎之於吳阪可謂困矣及其伯樂相之孫郵御
之形體不勞而坐取千里蓋伯樂善御馬明君善御臣
伯樂馳千里明君致太平誠任賢使能之明效也若朝

士惟良萬機內理武將行師方難克弭陛下可得雍容
都城何事勞動鑿駕暴露於邊境哉臣聞羊質虎皮見
草則悅見豺則戰忘其皮之虎也今置將不良有似於
此故語曰患為之者不知知之者不得為也昔樂毅奔
趙心不忘燕廉頗在楚思為趙將臣生乎亂長乎軍又
數承教於武皇帝伏見行師用兵之要不必取吳孫而
闇與之合竊揆之於心嘗願得一奉朝覲排金門蹈玉
陛列有職之臣賜須臾之間使臣得一散所懷摠舒蘊

積死不恨矣被鴻臚所下發士息書期會甚急又聞豹
尾已建戎軒驚駕陛下將復勞玉躬擾桂神臣思誠竦息
不遑寧處願得策馬執鞭首當塵露撮風后之竒接孫
吳之要追慕卜商起予左右効命先軀畢命輪轂雖無
大益冀有小補然天高聽遠情不上通徒獨望青雲而
拊心仰高天而歎息耳屈平曰國有驥而不知乘焉皇
皇而更索昔管蔡放誅周召作弼叔魚陷刑叔向佐國
三監之釁臣自當之二南之輔求必不遠華宗貴族藩

王之中必有應斯舉者故傳曰無周公之親不得行周公之事唯陛下少留意焉近者漢氏廣建藩王豐則連城數十約則饗食祖祭而已未若姬周之樹國五等之品制也若扶蘇之諫始皇淳于越之難周青臣可謂知時變矣夫能使天下傾耳注心者當權者是矣謀能移主威能懾下豪右執政不在親戚權之所在雖疏必重勢之所去雖親必輕蓋取齊者田族非呂宗也分晉者趙魏非姬姓也惟陛下察之苟吉專其位凶離其患者

異姓之臣也欲國之安祈家之貴存共其榮沒同其禍者公族之臣也今反公族疏而異姓親臣竊惑焉臣聞孟子曰君子窮則獨善其身達則兼善天下今因臣與陛下踐冰履炭登山浮澗寒溫燥濕高下共之豈得離陛下哉不勝憤懣拜表陳情若有不合乞且藏之書府不便滅棄臣死之後事或可思若有毫釐少挂聖意乞出之朝堂使夫博古之人糾臣表之不合義者如是則臣願足矣帝輒優文答報

植子濟北王志字允恭好學有才行晉武帝初為中撫軍迎常道鄉公於鄴志夜與帝相見帝與語從暮至旦甚器之

都亭侯仁初為議郎督騎從太祖圍壺關太祖令曰城拔皆坑之連月不下仁言於太祖曰圍城必示之活門所以開其生路也今公告之必死將人自為守且城固而糧多攻之則士卒傷守之則引日久今頓兵堅城之下以攻必死之虜非良計也太祖從之城降

晉新野王歆為荊州都督將之鎮與齊王冏同乘謁陵

因說冏曰成都至親

臣欽若等曰成都王穎也

同建大勲今宜留之

與輔政若不能耳當奪其兵權冏不從俄而冏敗歆懼自結於成都

秦王東武帝子帝嘗幸宣武場以三十六軍兵簿令東料較之東一省便摘脫謬帝異之於諸子中尤見寵愛後為大將軍錄尚書事時楊駿伏誅既痛舅氏覆滅甚有憂危之慮屢述武帝旨請還藩而汝南王亮留輔政

及亮與楚王偉被誅時人謂東有先識

譙王承元帝時為散騎常侍領左軍將軍王敦有無君之心表疏輕慢帝夜召承以敦表示之曰王敦頃年位任足矣而所求不已言至於此如之何承曰陛下早裁之難將作矣帝以承為湘州刺史時王敦據上流承赴任行達武昌釋戎備見王敦敦與之宴欲觀其意謂承曰大王雅素佳士恐非將帥才也承曰公未見知耳鈗刀豈不能一割乎承以敦欲測其情故發此言敦果謂

錢鳳曰彼不知懼而學壯語此之不武何能為也聽承
之鎮

宋長沙王義欣鎮壽陽時淮西河北長吏悉敘勞人武
夫多無政術義欣陳之曰江淮左右土墾民疎頃年以
來荐饑相襲百城彫弊於今為甚綏牧之宜必俟良吏
勞人武士不經政術統內官長多非才授東南殷實猶
或簡能况賓接荒垂而可輯柔頓闕願勅選部必使任得
其人庶不勞而治

廬陵王義真鎮東城高祖始踐祚義真色不悅侍讀博士蔡茂之問其故義真曰安不忘危休泰何可恃

江夏王義恭孝武世以西陽王子尚有盛寵解揚州以避之乃進位太宰領司徒義恭嘗慮為孝武所疑及海陵王休茂於襄陽為亂乃上表曰古先哲王莫不廣植周親以屏帝宇諸侯受爵亦願永固邦家至有管蔡梁燕致禍周漢上乖顯授之恩下忘血食之業夫善積慶深宜享長久而歷代侯王甚乎匹庶豈異姓皆賢宗室悉

不賢生於深宮不覩稼穡左右近習未值田蘇富貴驕奢自然而至聚毛折軸遂及危禍漢之諸王並置傅相猶不能禁逆七國連謀實繇強盛晉氏列封正足成永嘉之災尾大不掉終古同疾不有更張則其源莫救日者庶人恃親殆傾王業去歲西寇藉寵幾敗皇基不圖襄楚復生今釁良以地勝兵勇獎成凶惡前事之不忘後事之明兆陛下大明紹祚垂法萬乘臣年邁意塞無所知解忝皇族者長慚慨內深思表管見裨宗萬一竊謂

諸王貴重不應居邊至於華州優地時可暫出既已有
州不須置府若位登三事止乎長史掾屬若宜鎮御別
差扞城大將若情樂冲虛不宜逼以戎事若崇文好武
尤宜禁塞僚佐文學足充話言遊從之徒一皆勿許文
武從鎮以時休止妻子之累不煩自隨百僚脩詣宜遵
晉令悉須宣令齊到備列賓主之則衡泌之士亦無煩
干候貴王器甲於私為用蓋寡白金銀裝刀劍戰具之服
皆應輸送還本曲突徙薪防之有素庶善者無懼惡者

止姦

彭城王義康為司徒錄尚書事聰識過人一聞必記嘗
所暫遇終身不忘稠人廣席標題所憶以示聰明人物
益以此推服之

南齊豫章王嶷太祖第二子太祖帶南兗州鎮軍府長
史在鎮憂危既切期渡江北起兵嶷諫曰主上狂凶人
不自保單行道路易以立功外州起兵鮮有尅勝物情疑
惑必先人受禍今于此立計萬不可失會蒼梧王殞太

祖報嶷曰大事已判汝明可早入及為荊州刺史禪讓之間世祖欲速定大業嶷依違其事默無所言建元元年太祖即位赦詔未至嶷先下令蠲除國內昇明二年前逋負後出鎮東府先是王蘊薦部曲六十人助為城防實以為內應也嶷知蘊懷貳不給其仗散處外省及難作搜簡皆已亡去

始興王鑑為益州刺史城北門嘗閉不開鑑問其故於虞棕答曰蜀主多夷暴有時抄掠至城下故相承閉之

鑑曰古人云善閉無關捷且在德不在門即令開之戎
夷慕義自是清謚

梁鄱陽忠烈侯王恢在荊州嘗從容問賓客曰中山好

酒趙王好吏二者孰愈

臣欽若等曰中山王勝趙王彭祖皆漢景帝子也

衆未

有對者顧謂長史蕭琛曰漢時王侯藩屏而已視事親
民自有其職中山聽樂可得任性彭祖代吏近於侵官
今之侯王不守藩國當佐天子臨民清白其優乎坐者
咸服

長沙嗣王業幼而明敏識度過人

南海王大臨字仁宣為輕車將軍琅邪彭城二郡太守
時侯景亂為使持節宣惠將軍屯新亭俄又徵還屯端
門都督城南諸軍事時議者皆勸收外財物擬共賞賜
大臨獨曰物乃賞士而牛可犒軍命取牛得千餘頭城
內賴以享士及為吳郡太守張彪起義於會稽吳人陸
令公頴州庾孟卿等勸大臨走投彪大臨曰彪若成功
不資我力如其撓敗以我說焉不可往也

後魏陳留王崇性沉厚初衛王儀坐事賜死後道武欲
敦宗親之義詔引諸王子弟入宴常山王素等三十餘
人咸謂與衛王相坐疑懼皆出逃遁將奔蠕蠕唯崇獨
至道武見之甚悅厚加禮賜遂寵敬之素等於是亦安
樂平王丕明元子初馮弘之奔高麗太武詔遣送之高
麗不遣太武怒將討之丕上疏以為和龍新定宜優復之
使廣脩農植以饒軍實然後進圖可一舉而滅帝納之
乃止

元城侯屈明元時居門下出納詔命性明敏善奏事每
合上音

永昌王健所在征伐皆有大功才藝比陳留桓王而智
畧過之

常山王素為內都大官太武即位務從寬征罷雜調有
司奏國用不足固請復之唯素曰臣聞百姓不足君孰
與足帝善而從之

高陽王雍初封潁川王加侍中征南大將軍或說雍曰

諸王皆待士以營聲譽王何以獨否雍曰吾天子之子位為諸王用聲名何為

東陽王丕獻文時為侍中司徒公時有諸疑事三百餘條勅丕制決率皆合允及為太尉錄尚書事孝文文明太后重年敬舊存問周渥丕聲高氣朗博記國事享宴之際嘗居坐端必抗首大言敝列既往成敗帝后敬納焉

咸陽王禧為冀州刺史後朝京師孝文謂王公曰皇太

后平日以朝儀闕然遂命百官更欲撰緝今將舉脩遺志卿等謂可行不當各盡對無以面從禧對曰儀制之事用舍各隨其時而人可使由之不可使知之臣謂宜述先志備行朝式孝文然之

任城王澄為徐州刺史朝於京師引見於皇信堂孝文詔澄曰昔鄭子產鑄刑書而晉叔向非之此二人皆是賢士得失竟誰對曰鄭國寡弱介於強鄰民情去就非刑莫制故鑄刑書以示威雖乖古式合今權道隨時濟

世子產為得而叔向譏議示不忘古可與論道未可與權
孝文曰任城當欲為魏之子產也澄曰子產道合當時聲
流竹素臣何敢庶幾陛下以四海為家宣文德以懷天下
江外之阻車書未一季世之民易以威伏難以理治愚謂子
產之法猶可襲用大同之後便以道化之孝文心方革變深
善其對笑曰非任城無以識變化之體朕方創改朝制當與
任城共萬世之功耳及為尚書孝文外示南討意在謀遷齊
於明堂左介詔太常卿王謚親令龜易筮南伐之事其兆

遇革孝文曰此是湯武革命順人之卦也羣臣莫敢言
澄進曰易言革者更也將欲應天順人革君臣之命湯
武得之為吉陛下帝有天下重光累葉今日卜征乃可
伐叛不得云革命此非君人之卦未可全為吉也孝文
厲聲曰此象云大人虎變何言不吉也澄曰陛下龍興
既久豈可方同虎變孝文勃然作色曰社稷在我任城而
欲阻衆也澄曰社稷誠知陛下之社稷然臣是社稷之
臣子豫參顧問敢盡愚衷孝文既銳意必行澄此對父

之乃解曰各言其志亦復何傷車駕還宮乃召澄未及
昇階遙謂曰向者之革卦今更欲論之明堂之忿懼衆
人競言阻我大計故厲聲怖文武耳想解朕意也乃獨
謂澄曰今日之行誠知不易但國家興自北土徙居平
城雖富有四海文軌未一此間用武之地非可文治其
欲移風易俗信為甚難峭函故宅河雒王里因茲大舉
光宅中原任城意以為何如曰伊雒中區均天下所據
陛下制御華夏輯平九服蒼生聞此應當大慶孝文曰

北人戀本忽聞將移能不驚擾也澄曰此既非常之事當非常人所知唯須決之聖懷此輩亦何能為也孝文曰任城便我之子房加撫軍大將軍太子少保又兼尚書左僕射及駕幸雒陽定遷都之策孝文詔曰遷移之旨必須訪衆當遣任城馳驛向代問彼百司論擇可否近日論革今真所謂革也王其勉之既至代都衆聞遷詔莫不驚駭澄援引今古徐以曉之衆乃悅服澄遂南馳還報會車駕於滑臺孝文大悅曰若非任城朕事業

不就也時南齊雍州刺史曹虎請以襄陽內附分遣諸將車駕將自赴之豫州又表虎奉誠之使不復重來孝文乃引澄及咸陽王禧彭城王勰司徒馮誕司空穆亮鎮南李冲等議之孝文曰比得邊州表云襄陽慕化朕將鳴鑿江沔為彼聲勢今復表稱更無後信於行留之計竟欲如何禧等或云宜行或言宜止孝文曰衆人紛紛意見不等朕莫知所從必欲盡留行之勢使言理俱暢者宜有客主共相起發任城與鎮南為應留之議朕當

為宜行之論諸公俱坐聽得失長者從之於是孝文曰
二賢試言畱計也冲對曰臣以徒御草創人斯樂安內
而應者未審不宜輕爾動發孝文曰襄陽款問似當是
虛亦知初遷之民無宜勞役脫歸誠有實即當乘其悅
附遠則有會稽之會近則畧平江北如其送款是虛且
可遊巡淮楚問民之瘼使彼土蒼生知君德之所及復
何所損而惜此一舉脫降問是實而停不撫接不亦稽
阻款誠毀朕大畧也澄曰降問若審應有表質而使人

一返靜無音問其詐也可見今代遷之衆人懷戀本細累相
携始就雒邑居無一椽之室家闕擔石之糧而使怨苦
即戎泣當白刃恐非歌舞之師也今茲區宇初構又東
作方興正是子來百堵之日農夫肆力之秋宜寬彼逋
誅急此民疾且三軍已援無稽赴接苟其款實力足納
撫待尅平襄沔然後動駕今無故勞涉空為往返必挫
損天威更成賊膽願上覽盤庚始遷之艱難下矜詩人
由庚之至詠輯寧新邑惠康億兆而司空亮以為宜行

公卿皆同之澄謂亮曰公在外見旌鉞既張而有憂色
每聞談論不願此行何得對聖顏更如斯之語也面背
不同事涉欺佞非所謂論道之德更失國士之體或有傾
側當繇公輩侍臣李沖曰任城王可謂忠於社稷願陛
下深察其言臣等在外皆憚征行惟貴與賤不謀同辭仰
願聖心裁其可否孝文曰任城適以公等從朕有如此
論不從朕者何必皆忠而通識安危也小忠是大忠之
賊無乃似諸澄曰小忠要是竭盡微款不知大忠者竟

何據孝文曰任城脫居台輔之任欲令大忠在已也澄
曰臣誠才非台弼智闕和鼎脫得濫居公鉉庶當官而
行不負愚志孝文大笑澄又謂亮曰昔汲黯於漢武前
面折公孫食脫粟飯卧布被云其詐也於時公孫謙讓
下之武帝嘆曰汲黯至忠公孫長者二人稱賢公既道
均昔士願思長者之言孝文笑曰任城欲自比汲黯也
且所言是公未知得失所在何便謝司空也駕遂南伐
宣武時總督揚江二州伐梁獲其冠軍將軍張惠炤後

梁武有移求換惠炤澄表請不許詔付八座會議尚書
令廣陽王嘉等奏宜還之詔乃聽還後果復寇邊孝明
時澄以北邊鎮將選舉既輕恐賊虜闕邊山陵危迫奏
求重鎮將之選脩警備之嚴詔不從賊虜入寇至於舊
都鎮將多非其人所在叛亂犯逼山陵如澄所慮

彭城王勰孝文時為中書令孝文與侍臣昇金墉城顧
見堂後桐竹曰鳳凰非梧桐不栖非竹實不食今桐竹
並藏詎能降鳳乎勰對曰鳳凰應德而來豈桐竹能降

孝文曰何以言之。總曰昔在虞舜，鳳凰來儀，周之興也。鸞鷲鳴於岐山，未聞降桐食竹。孝文笑曰：朕亦未望降之也。後從孝文征沔北，為使持節都督南征諸軍事。中軍大將軍開府，詔曰：明便交敵，可勅將士肅爾軍儀。總於是親勒大衆，須臾有二大鳥從南而來，一向行宮，一向幕府，各為人所獲。總言於孝文曰：始有一鳥望旗，顛仆。臣謂大吉。高祖戲之曰：鳥之畏威，豈獨中軍之畧吾亦分其一耳。此乃大善。兵法咸說至明，便大破齊將崔

惠景蕭衍其夜大雨帝曰昔聞國軍獲勝每逢雲雨今
破新亭南陽及摧此賊果降時潤誠哉斯言總對曰水
德之應遠稱天心宣武時為太師議律令總與高陽王
雍八座朝士有才學者每旦集參論軌制應否之宜而
總夙侍孝文兼聰達博見凡所裁決時彥歸仰

清河王懌宣武初為尚書僕射懌才長從政明於斷決
剖判衆務甚有聲名

廣陽王嘉之子深孝明時以沃野鎮人破六韓拔陵反

叛臨淮王彧討之失利詔深為北道大都督受尚書令
李崇節度及李崇徵還深專總戎政拔陵避蠕蠕南移
渡河先是別將李叔仁以拔陵來逼請求迎援深赴之
前後降附二十萬人深與行臺元纂表求恒州北別立
郡縣安置降戶隨宜賑賚息其亂心不從詔遣黃門郎
楊置分散之於冀定瀛三州就食深謂纂曰此輩復為
乞活矣禍亂當繇此作既而鮮于修禮叛於定州杜維
周反於幽州

常山王素孫暉宣武初為黃門侍郎初孝文遷維舊貴
皆難移時欲和衆情遂許冬則居南夏便居北宣武頗
惑左右之言外人遂有還北之問至於榜賣田宅不安
其居暉乃請問言事具奏所聞曰先皇移都以百姓戀
土故發冬夏二居之詔權寧物意耳乃是當時之言實非先
皇深意且比來遷人安居歲久公私計立無復還情伏
願陛下終高祖既定之業勿信邪臣不然之說從之
北齊趙郡王琛子叡閑習吏職有知人之鑒

後周齊王憲字昆賀突太祖嘗賜諸子良馬唯其所擇
憲獨取其駁者太祖問之對曰此馬色類既殊或多駿
逸若從軍征伐牧圉易分太祖喜曰此兒智識不凡當
成重器後從獵隴上經官馬牧太祖每見駁馬輒曰此我兒
馬也因令左右取以賜之

汝南公慶字神慶深沉有器局少以聰敏見知初受業
東觀頗涉經史既而謂人曰書記姓名而已安能乂事
筆硯為腐儒業乎時文州賊亂慶應募從征以功授都

督

隋河間王宏性明悟有文武幹畧數從征伐累遷開府儀同三司

觀德王雄高祖族子也有器度或奏高頰朋黨者高祖詰雄於朝雄對曰臣忝衛宮闈朝夕左右若有朋附豈容不知至尊欽明睿哲萬機親覽頰用心平允奉法而行此乃愛憎之理惟陛下察之高祖深然其言

唐河間王孝恭性寬恕退謙無驕矜自伐之色嘗悵然

謂所親曰吾所居宅微為壯麗非吾心也將賣之別營一所粗令充事而已身歿之後諸子若才守此足矣如其不才冀免他人所利也初為山南道招慰大使自金州出于巴蜀招攜以禮降附者三十餘州孝恭進擊朱粲破之諸將曰此食人賊也為害實深請坑之孝恭曰不可自此以東皆為寇境若聞此事豈有來降者乎盡赦而不殺繇是書檄所至相繼降款又輔公柘據江東反發兵寇壽陽命孝恭為行軍元帥以擊之孝恭自荆

州起九江時李靖李勣黃君漢張鎮州盧祖尚並受孝
恭節度將發與諸將宴集命取水忽變為血在坐者皆
失色孝恭舉止自若徐諭之曰禍福無門唯人自召自
顧無負於物諸君何見憂之深公祐惡積禍盈今承廟
算以致討盃中之血乃公祐授首之徵遂盡飲而罷時
人服其識度而能安衆後公祐窮蹙棄揚州東走孝恭
命騎將追之至武康擒公祐及其偽僕射西門君儀等
數千人致於麾下江南悉平

江夏王道宗為禮部尚書時侯君集立功於高昌潛有異志道宗嘗因侍宴從容曰君集知小言大舉止不倫以臣觀之必為戎首太宗曰何以知之對曰見其恃有微功深懷矜伐恥在房玄齡李靖之下雖為吏部尚書未滿其志非毀時賢常有不平之語太宗曰豈可臆度浪生猜貳其功勲才用無所不堪朕豈惜重位但次第未到耳俄而君集謀反太宗笑謂道宗曰君集之事果如公所揣

霍王元軌為定州刺史突厥之入寇也州人李嘉運與賊相連謀為內應高宗令收按其黨元軌以強寇在境人心不安唯殺嘉運餘無所及因自劾違制高宗覽表大悅謂使者曰朕亦悔之向無王則失定州矣後因入朝屢上疏陳時得失多所裨益高宗甚尊重之及在外藩朝廷每有大事或密制問焉

潁王璠天寶末祿山之亂璠為劍南節度大使初奉命之藩卒遽不皇受節綿州司馬史賁進說曰王帝子也

且為節度大使今之藩而不持節單騎徑進人何所瞻
請建大槩蒙之油囊為旌節狀先驅道路足以威眾
璫笑曰但為真王何用假旌節

嗣曹王臯多智數善因事以自便奉太妃鄭氏以孝聞
晉趙王萬詮子敬暉生而寵厚剛毅雄直有器局行不繇
徑臨事多智故高祖於宗屬之中獨優禮厚遇



冊府元龜卷二百七十三